

MISA CON NENOS  
25 de outubro 2020  
ORDINARIO 30º-A

*Mateo 22,34-40: "Amarás a Deus e o próximo como a ti mesmo".*  
Mensaxe: AMA a DEUS sobre todas as COUSAS Fratelli tutti.



**Amar a Deus sobre todas as cousas  
e ao próximo "Fratelli tutti"**

# 1. ACOLLIDA

Irmáns e irmás:

Estamos terminando o mes de outubro, o mes da Virxe, o mes do Rosario. Neste domingo 30 do tempo ordinario, a Palabra de Deus é moi clara: o amor a Deus é o gran agasallo que a nosa fe nos ten que dar. E, cando un descobre o amor de Deus, á forza e sen querelo temos que amar os demais. Amar a Deus de verdade e, a continuación, querer a aqueles que viven cerca ou lonxe de nós, é o gran reto para esta semana. É o que o papa Francisco nos recorda na seu encíclica Fratelli tutti (todos irmáns).

Que esta Eucaristía nos axude, no Día do Señor, a non esquecer que, entre moitas cousas, letras, invitacións, escaparates ou diversións...nada nos ha de distraer do amor a Deus e aos demais.

**SAÚDO do sacerdote:** O que nos define aos cristiáns é amar. Comezamos recordando a aquel que sabemos que nos ama:

**No nome do Pai...** *Deus Pai, Fillo e Espírito santo, rico en misericordia e en amor, sexa convosco.*

*(Pódese mostrar o cartel co lema: “Ama a Deus sobre todas as cousas Fratelli tutti”).*

## 2. PERDÓN

**Sacerdote:** *Ao Deus da misericordia que tanto nos quere e nos busca, pedímoslle perdón.*

- **(Posible... pai-nai):** Ti, que nos chamas a adorar a Deus coa nosa vida. **Señor, ten piedade de nós.**
- **(Posible... catequista):** Ti, que nos mostras que a Deus só se pode adorar e servir cando amamos o irmán. **Cristo, ten piedade de nós**
- **(Posible... neno-nena):** Ti, que desexas que construamos un mundo de amor, de proximidade, sendo solidarios e irmáns de todos. **Señor, ten piedade de nós**


### 3. PALABRA DE DEUS

#### *Monición ás lecturas:*

Se nos preguntamos que é o esencial da mensaxe de Xesús respóndennolo hoxe as lecturas: amar a Deus e amar ao próximo.

O Evanxeo de S. Mateo dinos que o amor a Deus ha de ser con todo o corazón, por encima da montaña de cousas que temos.

O libro do Éxodo pídenos que tratemos como a un irmán o emigrante e que Deus será o seu defensor. S. Paulo eloxia os Tesalonicenses porque abandonaron os ídolos para adorar e servir a Deus. escoitemos con atención.



**ÉXODO 22,20-26:** *Se explotades a viúvas e a orfos, acenderase a miña ira contra vós.*

Isto di o Señor «**Non maltratarás nin oprimirás o emigrante**, pois emigrantes fostes vós na terra de Exipto. Non explotarás a viúvas nin a orfos.

Se os explotas e gritan a min, eu escoitarei o seu clamor, acenderase a miña ira e matareivos a espada; as vosas mulleres quedarán viúvas e os vosos fillos orfos.

Se prestas diñeiro a alguén do meu pobo, a un pobre que habita contigo, non serás con el un usureiro cargándolle intereses. Se tomas en peza o manto do teu próximo, devolveraslo antes de poñerse o sol, porque non ten outro vestido para cubrir o seu corpo, e onde, se non, se vai deitar? **Se grita a min, eu escoitareino, porque eu son compasivo».**

*Palabra do Señor.*

**SALMO 17: R/.** Eu ámote, Señor; ti es a miña fortaleza.

**1ª TESALONICENSES 1,5c-10:** **Convertéstesvos, abandonando os ídolos, para servir a Deus e vivir agardando a volta de seu Fillo.**

Irmáns:

Sabedes como nos comportamos entre vós para o voso ben. E vós seguistes o noso exemplo e o do Señor, **acollendo a Palabra** no medio dunha gran tribulación, coa alegría do Espírito Santo.

Así chegastes a ser un modelo para todos os crentes de Macedonia e de Acaia. Non só resoou a palabra do Señor en Macedonia e en Acaia desde a vosa comunidade, senón que ademais a vosa fe en Deus difundíuse por todas as partes, de modo que nós non tiñamos necesidade de explicar nada, xa que eles mesmos contan os detalles da visita que vos fixemos: **como vos convertestes a Deus, abandonando os ídolos, para servir ao Deus vivo e verdadeiro**, e vivir agardando a volta do seu Fillo Xesús desde o ceo, a quen resucitou de entre os mortos e que nos libra do castigo futuro.

*Palabra do Señor.*

**MATEO 22,34-40:** *Amarás a Deus e o próximo como a ti mesmo.*

**Narrador:** Naquel tempo, os fariseos, ao oír que Xesús fixera calar aos saduceos, reuníronse nun lugar e un deles, un doutor da lei, preguntoulle para poñelo a proba:

**Fariseos:** -«*Mestre, cal é o mandamento principal da lei?*».

**Narrador:** El díxolle:

**Xesús:** -«*”Amarás o Señor, o teu Deus, con todo o teu corazón, con toda a túa alma, con toda a túa mente”*».

Este mandamento é o principal e primeiro. O segundo é semellante a el: *“Amarás o teu próximo como a ti mesmo”*.

*Nestes dous mandamentos sostéñense toda a Lei e os Profetas».*

*Palabra do Señor.*

*(Narrador-Fariseos-Xesús).*

## 4. ORACIÓN DA COMUNIDADE

*(Sacerdote:) A Xesucristo, que viviu a vontade do Pai e a solidariedade cos homes como un mesmo amor, pidámoslle:*

*-Axúdanos a vivir todos como irmáns.*

- 1.- Que a túa Igrexa sexa testemuña do amor de Deus, lugar de acollida e de perdón. **Oremos.**
- 2.- Que amemos e adoremos o Deus persoal que acompaña a nosa vida e nos interpela. **Oremos.**
- 3.- Que te queiramos, Señor, con toda a alma e con todo o corazón. **Oremos.**
- 4.- Que descubramos que non podemos amar a Deus sen amar o irmán. **Oremos.**
- 5.- Que nos doian as persoas que son maltratadas ou que o pasan mal. **Oremos.**
- 6.- Que o amor aos necesitados nos leve a descubrir o rostro de Deus neles. **Oremos.**
- 7.- Que os nenos teñan na casa o primeiro modelo de amor na súa familia. **Oremos.**
- 8.- Polos enfermos de coronavirus, polos que sofren, polos que perderon o traballo ou faleceron. **Oremos.**

*Señor, que vivamos a fraternidade “recoñecendo, valorando e amando a cada persoa máis aló do lugar onde naza ou onde habite” (FT 1). Por XCNS.  
Amén*

## 5. PRESENTACIÓN DE OFRENDAS (Posibilidades)

### **-LIBRO DA BIBLIA:**

Este libro, con tantas páxinas e con tanta mensaxe, é o libro da biblia e resúmese nestas dúas frases: "Ama a Deus" e "Ama o próximo". Oxalá sexa o noso libro de cabeceira, o que guíe a nosa vida e o noso xeito de ser.

### **-ENCÍCLICA FRATELLI TUTI (Todos irmáns):**

Esta encíclica do Papa explícanos como vivir neste ano 2020 a pandemia, como ser próximos e samaritanos co próximo, como vivir a fraternidade hoxe. Que a leamos e a asumamos todos.

### **CAIXA DE CAMELOS (pódense repartir ao final):**

Os amigos de Xesús reparten o seu amor a todas as persoas. Ofrecemos estes caramelos como expresión do noso desexo de querer a todos pois querer os demais é ser como os caramelos, sempre doces, facendo felices, dándonos.

### **PAN E VIÑO:**

Co pan e o viño traemos ante o Señor o noso agradecemento polo moito que nos dá. Polo sol e as estrelas, polo pan e a auga, polo traballo e o seu agarimo cara a nós. E pedímoslle por aqueles que prescindén de Deus nas súas vidas.

## 6. SUXESTIÓNS

- Analizade nesta semana como ides concretando no día a día a única fórmula que nos deixou Xesús: amor a Deus e ao próximo.
- Dá grazas porque o seu mandamento, a súa lei, é o Amor. Ama a Deus de corazón, dillo, rézalle, conta con el, obedece a súa vontade.
- Preguntade como os santos concretaron o seu vivencia do amor de xeito admirable, poñendo a súa vida, os seus pés, o seu corazón, todo o seu ser en Cristo.
- Lede a encíclica Fratelli Tutti (todos irmáns), comentádea en grupos, resume cales son os criterios para vivir hoxe a fraternidade, enviade algunha frase da encíclica aos vossos amigos ou poñédea en facebook ou instagram para eles.
- Fixámonos no salmo 17 que nos axuda a loar a Deus coa descrición deses oito títulos: é a nosa roca, alcázar, liberador, penedo refuxio, escudo, baluarte e forza salvadora.
- Rezamos a Oración ao Creador, extraída da Encíclica Fratelli Tutti nº 287 do Papa Francisco, que aparece na contraportada.
- O catequista pode ao final repartir caramelos explicando que querer aos demais é ser como os caramelos, doces e facendo felices os demais.



## 7. POSCOMUNIÓN:




### POSIBLE ORACIÓN DE GRAZAS

#### Oración ao Creador (Fratelli tutti nº 287)

Señor y e Pai da humanidade,  
Que creaches a todos os seres humanos coa mesma dignidade,  
infunde nos nosos corazóns un espírito fraternal.  
Inspíranos un soño de reencontro, de diálogo, de xustiza e de paz.  
Impúlsanos a crear sociedades máis sas  
e un mundo máis digno, sen fame, sen pobreza, sen  
violencia, sen guerras.  
Que o noso corazón ábrase  
a todos os pobos e nacións da terra,  
para recoñecer o ben e a beleza que sementaches en cada un,  
para estreitar lazos de unidade, de proxectos comúns,  
de esperanzas compartidas. Amén. Papa Francisco.



- *"As palabras de S. Francisco feliz quen ame o outro de preto e de lonxe, expresa o esencial dunha fraternidade aberta que permita recoñecer e amar a cada un máis alá de onde habite".  
Francisco, Fratelli tutti nº 1.*



FELIZ DOMINGO, DÍA DO SEÑOR.  
REDE CATEQUISTAS GALICIA